



Communicaziun a las medias

Sentenzia dals 11 da mars 2025 (VR3 19 99)

La Dretgira superiura dal chantun Grischun ha approvà parzialmain in recurs d'organisaziuns per la protecziun da l'ambient cunter ina revisiun parziala da la planisaziun locala da la vischnanca Val Müstair en connex cun il project turistic planisà «La Sassa Val Müstair». La runcada da guaud per il stabiliment da parcar sur terra planisà è vegnida qualifitgada sco na betg conform a la lescha. Dal rest è il recurs vegnì refusà.

En il territori «Prà Chalchera» che giascha a l'ur occidental da la fracziun Tschierv duai vegnì realisà il resort da vacanzas «La Sassa». Cun ina revisiun parziala da la planisaziun locala han las votantas ed ils votants da la vischnanca Val Müstair stgaffì en la radunanza communal dals 14 da settember 2018 las premissas en la planisaziun d'utilisaziun per quest intent. Il resort vegniss erregì dasper la staziun da val d'ina pendiculara apportadra planisada che maina en il territori da skis «Minschuns». Construcziun e manaschi da questa pendiculara cun cabinas per otg persunas preten- dan l'approvaziun dal plan sco era ina permissiun da manaschi dalla Confederaziun. Ina dumonda correspundenta è vegnida inoltrada il december 2018 tar l'Uffizi federal da traffic a Berna. En il decurs da questa procedura èn era vegnidas giuditgadas las influenzas da la pendiculara sin il maletg da la cuntrada e l'ambient (flora e fauna). La procedura è anc pendent.

Ils 5 da november 2019 ha la regenza grischuna approvà la revisiun parziala da la planisaziun locala cun orientaziun al project decidida da la vischnanca Val Müstair. Cunter questa decisiun han las organisaziuns per la protecziun da l'ambient, la Funda- ziun svizra per la protecziun da la cuntrada e Mountain Wilderness fatg recurs tar l'an- teriura Dretgira administrativa dal chantun Grischun (oz la Dretgira superiura dal chan- tun Grischun). Ils recurrents han admonì en general, ch'i na dettia nagin basegn per in resort d'ina tala grondezza. Ils interess publics, la protecziun da la natira e da la patria sco era la protecziun da l'ambient, prevalian e stettian encunter als projects dal resort da vacanzas e la pendiculara apportadra. Plinavant han ils recurrents admonì ch'ina runcada d'uaul per il stabiliment da parcar sur terra planisà na saja betg admissibla, ed els temevan ina guntgida da la legislaziun davart las abitaziuns secundaras. La regenza e la vischnanca Val Müstair han dumandà ch'il recurs vegnia refusà. Els han

tranter auter fatg valair che la realisaziun dal project cumplet portia grondas schanzas per il turissem e saja perquai impurtanta per il svilup da la Val Müstair.

Sin proposta da las partidas è la procedura vegnida sistida l'entschatta dal 2020: En ils quater onns suandants è questa sistida alura vegnida prolungada pliras giadas. Il favrer 2024 è la procedura la finala vegnida continuada.

En sia sentenza è la Dretgira superiura vegnida alla conclusiun, che la revisiun parziala da la planisaziun locala cun orientaziun al project dal resort «La Sassa» sa basia sin in accent principal dal svilup cantunal e regional dal plan directiv. L'admoniziun da las organisaziuns per la protecziun da l'ambient recurrentas pertutgant la mancaza d'ina cumprova dal basegn n'è ord vista da la Dretgira superiura era betg fundada: Ils plans concrets avant maun mussan, ch'in potenzial da svilup turistic exista per la regiun Val Müstair. Plinavant na po en il stan actual da la procedura dal plan d'utilisaziun betg vegnì constatà ina violaziun da la Lescha federala davart las abitaziuns secundaras.

Vegnì approvà è il recurs da las organisaziuns per la protecziun da l'ambient percenter areguard la lubientscha per la runcada en connex cun la construcziun d'in stabiliment da parcar sur terra cun rodund 130 parcadis planisà directamain tar la staziun da val e tar il resort da vacanzas. Qua considerescha la Dretgira superiura, che la zona da parcadis determinada danov e la runcada da totalmain 457 meters quadrat gaud ch'è colliada cun quai n'è betg confurma a la lescha – quai malgrad la cumpensaziun reala prevesida ed in interess public per ils parcadis. Il conclus d'approvaziun da la regenza è vegnì abrogads en quest punct.

La sentenza n'ha nagina vigur legala. Ella po vegnir contestada tar il Tribunal federal.

Cuira, ils 26 da mars 2025

Dretgira chantunala dal Grischun

Contact: Stefan Schmid, incumbensà per l'infurmaziun per las dretgiras grischunas, medien.og@gr.ch

Avis: La communicaziun a las medias intenda l'infurmaziun da la publicitad e las medias. Las formulaziuns utilisadas pon esser differentas da talas en la sentenza. Per la giurisdicziun è sulettamain la sentenza en scrit determinanta. Tala vegn publicgada sin <https://entscheidsuche.gr.ch>.